

## 每週經課朗誦經文(巴克禮漢羅/教羅)2013/09/15

### 共同經課 - 1 耶利米書四章十一節~十二節，二十二節~二十八節

11 Hit 時 beh 有話對 chit-ê 百姓 kap 耶路撒冷講，Beh 有熱熱 ê 風，tùi 曠野光 khō-khō 高 ê 所在，ng 我 ê 眾百姓吹來；m̄ 是 beh 簸伊，亦 m̄ 是 beh hō 伊清氣。12 Beh 有 koh-khah 大 ê 風，爲 tiòh 我吹來；ta<sup>n</sup> 我 koh beh 發出判詞來攻擊 in。22 我 ê 百姓愚戇，m̄-bat 我；in 是愚戇無聰明 ê kiá<sup>n</sup>；行 phái<sup>n</sup> 就 gâu，行好就 ham-bān。23 先知講，我看地，看 ah，地是空空渾沌；我看天，天亦無光。24 我看 hiah-ê 大山，看 ah，in lóng 振動；小山亦 lóng 搖來搖去。25 我 koh 看，看 ah，lóng 無人；空中 ê 飛鳥，亦 lóng 飛走。26 我 koh 看伊，看 ah，肥 ê 田變做拋荒 ê 地；一切 ê 城 tī 耶和華 ê 面前，因爲祂 ê 大受氣，lóng 總倒壞。27 因爲耶和華 án-ni 講，全地的確拋荒；總是我無 beh 毀滅到盡。28 因爲 án-ni 地 beh 憂悶，天頂也 beh 烏暗；我已經講伊，已經定 tiòh 伊，的確無退悔，也無 oát-tng 意思，m̄ 做伊。

### 共同經課 - 2 詩篇十四篇

1 大衛 ê 詩，交 hō 樂官。1) 戇人心內講，無有上帝。In thàn 邪惡，行可惡 ê 事；無一人行好。2 耶和華 tùi 天 à<sup>n</sup> 落看世間人，Beh 看有明理 ê，有 chhē 求上帝 ê á 無。3 In lóng 歪 chhoah，一概變做污穢；無人行好，連一個亦無。4 做 phái<sup>n</sup> ê 人 kiám lóng boē 曉得 mah？In 吞食我 ê 百姓親像食餅，亦無求叫耶和華。5 In tī-hia 大大驚惶；因爲上帝 tī 義人 ê 族類中。6 Lín hō sòng-hiong 人 ê 計謀變做見笑，總是耶和華做伊逃閃 ê 所在。7 願以色列 ê 拯救 tùi 錫安出！耶和華救伊受掠 ê 百姓 tò-tng 來，Hit 時雅各 beh 快樂，以色列 beh 歡喜。

### 共同經課 - 3 提摩太前書一章十二節~十七節

12 我感謝 hō 我有氣力 ê，就是咱 ê 主基督耶穌，因爲伊掠我做盡忠，設立我做差用；13 我前是謗瀆 ê，khún-tiok ê，侮慢 ê，總是我 chit 號所做是出 tī m̄ 知 m̄ 信，chiah 得 tiòh 憐憫。14 Koh 咱 ê 主 ê 恩典是格外豐盛，hō 我 tī 基督耶穌有信有疼 ê 心。15 有一句話 thang 信 thang 齊全接納 ê，就是基督耶穌臨到世間，beh 救有罪 ê 人，其中我是第一 phái<sup>n</sup>。16 但是我得 tiòh 憐憫，是因爲耶穌基督 beh tī 我，第一 phái<sup>n</sup> ê 人，顯明伊一切 ê 吞忍，來做後來信靠伊得 tiòh 永活 ê 人 ê 模樣。17 願尊貴榮光歸 tī boē 毀壞，看 boē tiòh，萬世代 ê 王，獨一 ê 上帝，到代代無盡。À-bēng。

### 共同經課 - 4 路加福音十五章一節~十節

1 眾抽餉 ê Kap phái<sup>n</sup> 人 teh 就近耶穌來聽伊 2 法利賽人 kap 經學士 ngauh-ngauh 念講，Chit-ê 人接納 phái<sup>n</sup> 人，續 kap in 食。3 耶穌設 chit-ê 譬喻對 in 講，4 Lín 中間甚麼人有一百隻羊，失落一隻，kiám 無請放九十九隻 tī 山裡，去 chhē 所失落 ê 到得 tiòh mah？5 已經 chhē-tiòh 就歡喜，背伊 tī 肩頭頂。6 到厝就聚集伊 ê 朋友厝邊，kā in 講，Tiòh kap 我歡喜，因爲所失落 ê 羊我已經 chhē-tiòh。7 我 kā lín 講，Phái<sup>n</sup> 人中有一人反悔，就 tī 天裡也 beh án-ni 爲 tiòh 伊歡喜，比爲 tiòh 九十九 ê 義人 m̄ 免反悔 ê，koh khah 歡喜。8 Á 是甚麼婦人人有十個銀 á，若失落一個，kiám 無點燈、掃厝，勤勤 chhē 到 tiòh mah？9 已經 chhē-tiòh，就聚集伊 ê 朋友厝邊講，Tiòh kap 我歡喜，因爲所失落 ê 銀 á 我已經 chhē-tiòh。10 我 kā lín 講，Phái<sup>n</sup> 人中有一人反悔，就 tī 上帝天使 ê 面前爲 tiòh 伊歡喜也是 án-ni。